


રત્નામ રબ્બળ


નિર્ગમન 16-17; ગણના 10-14;20;27; પુર્નનિયમ 34




દેવ તિયા કરારા ભાગરૂપ જો નિયમ તિહાં પાહાં પળાવના ઈચ્છતા તે કયા ફસી તિહ સિનાઈ ડોગ સોળ્યા, દે'વ તિહાન વચના દેશ જો કનાન કવાત્ના તે આંગ તિહાંન નેત જાના ચાલુ કયો. મેઘસ્તંભ કનાના આ'ગ જાત્ના અન તિ તિયા ફાસ જીયે.




દે'વ ઈબ્રાહિમાન ઈશાકાન અન યાકુબાન વચન આપીનો અતો કે તો તિહાં વંશજાહાંન તો વચના દેશ આપી, પન અમુ તાંચ જબરી દેશજાતિ રતની, તિ કનાની કવાત્ને, કનાની દેવાન ભજતે બી નીથે કે આજ્ઞા બી પાળતે નીથે, તિ ખોટા દેવા ભક્તિ અન ખોટે કામે કલ્ને.



દે'વ ઈઝાયેલીહાંન કયો, "તુમ વચના દેશામ બદા કનાનીહાંથી આઝાદ રના તિંહા હાતિ સલાહ ની કના અન તિંહા હાતિ વેહવાલ બી ની કના. તુમા તિંહા બદી મૂર્તેહે નાશ કના. જો તુમ્હી મા આજ્ઞા ની પાળહાં ત તુમી મા જગ્યાપ તિંહા મૂર્તેહે ભજન કહા.



જાંહા ઈઝાયેલીએ કનાના હિમાળ પોંચ્યે, મુ'સ બાર માંહાંન પંસંદ કયે. ઈઝાયેલા બ'દ કુળહાંમથી એક. તિ'ય તે માંહાંન તે દેશા ખબર કાળા મોકન્યા કે તો દેશ કળા જીહના સય તિ પાલા. તિહાંન કનાનીહાં બી ખબર કાળના કયો કે તિ જોરાવર સય કે પોંજલે




બાર ભાયળા ચાલીહ દિહ હુદી કનાનામ ફીર્યા અન તાંચ ફસી તો ફાસા આલા. તિંહ માહાંન કયો, "દેશા જમીન ઉપજાવ સય અન તિયામ જબરા પાક વહય." પન તિહાંમરા દસ જાસુસંહ કયો, "શેર જબરો મજબુત સય અન માંહે હોબદે સય! જો આપી તિંહા ઉપ હુમલા કહું ત તિ ચોક્કસ આપહન આરવીત ન માત નાખી!"




તરત જ કાલેબ અન યહુશુઆ જો બીજા બેન જાસુસ અતા તીહં કયો, "એ હાસો સય કે કનાના માંહે ઉંચે અન હોબદે સય, પન ચોક્કસ તિહાંન આપી આરવીત સકજીહી! દેવ આપ હારુ યુદ્ધ કયા!"




પન માંહે કાલેબ અન યહુશુઆ ઉનાયો ની.તિ મુસા અન હારુના ઉપ ઝંઝવાયે અન કયો, "કા કના તુ આમ્હાન આય ભયાનક જગા પ નેત આલ્હા? આમી આયાં યુદ્ધમી મના કતા અન આમા નાડિયા અન આમા પયરે ગુલામ બનય ઈ કતા આમ્હ મિસરામ રનું જોવત્નો. માંહે મિસરામ ફાસે જાના હારૂ બી'જ આગેવાનહાંન પસંદ કના માંગત્ને.




દેવ તિહાંથી જબરા ઝંઝવાયા અન તો મુલાકાત મંડપમી આલા. દે'વ તિહાન કયો, કેવ કે તુમી મા વિરૂદ્ધ બોન્હે. ઈત તુમી બદે માંહે રાનામ રખળહા. કાલેબ અન યહુશુઆ સિવાય બદે માંહે જી વિહ વરહા અથવા તિયાથી વડા વય તો મય અન કોય દિહ બી વયના દેશામ ફોત શકય ની.




જાંહા માંહ તિ ઉનાયો તાંહ માંહ પોતા કયને પાપહાં હારુ દુઃખી વયે. તિંહ પોતા હથિયારે ઉઠાવ્યે અન કનાન દેશા માંહા ઉપ હુમલા કયા. મુ'સ તિહાંન જાના હારુ ના કયો, કેવકે દેવ તિંહા હાતિ નીથા. પન તિંહ તિયા ઉનાયો ની.



દેવ તિંહા હાતિ આય યુદ્ધમી જીયા ની. અન તિંહા હાર વયી. અન તિહાંમરે કથેક માંહે મત જીયે. તાંહા ઈઝ્રાયેલીએ કનાનથી ફાસે ફિરયે અન ચાલીહ વરહ હુદિ રાનામ રખળયે (ભટકયે).



આય ચાલીહ વરહ જીયામ ઈઝાયેલી માંહે રાનામ રખળયે તાંય હુદિ દે'વ તિંહાન પોહયે. તિય તિંહાંન જુગાયે ટાક જે માજા કવાહાય તે આપી. તિય લાવરીહાં ટોલાન તિંહા તંબુહા વચ્ચ તો નેત આલા, ઈત કે તિ માંહ ખાત શકય. આય સમય હુદિ દે'વ તિંહાં નુગડે અન તિંહાં ચંપલે ઝાંખે વના દેદે ની.




દે'વ તિંહાન ચમત્કારીક રીત ફતરામથી પાંચ આપ્યો. પન આય બધો વના છતા ઈઝાયેલી માંહ દેવા અન મુસા વિરુદ્ધ કાંગા કયા. તેવ બી દેવ ઈબ્રાહિમ, ઈસાક અન યાકુબા પ્રત્ય પોતા વચના હારૂં વિશ્વાસુ રયા.



બીજી વાર જાંહા માંહા પાંહ પાંચ નતો, દે'વ મુસાન કયો, "ડોગાન ક અન પાંઈ બાર આવી." પન મુ'સ બ'દ માંહા આ'ગ દેવા આજ્ઞા પાળી ની. અન ડોગાન બોનના જગાપ તિય બેનવાર ડોગાન નાકળી લગાવી. બદ માંહા હારું ફતરામથી પાંચ નિકીત આલો, પન દેવ મુસા ઉપ ઝંઝવાયા અન કયો, "તુ વચના દેશામ જાહ ની."



ચાલિહ વરહ હુદિ ઈઝાયેલીએ રાનામ રખળયે. તાંચ ફસી તી બદે જીહં દેવા વિરુદ્ધ ઉઠીને તિ બદે મત જીયે તાંચ ફસી દે'વ માંહાન વચના દેશા હિમાળા ઉ'પ નેત જીયા. મુ'સા અમુ જબરા ડાયા વચના, ઈત દે'વ યહોશુઆન માંહાંન ચનાવના અન તિંહા મદદ કના હારું પસંદ કયા. દે'વ મુસાન વચન આપ્યો કે એક દિહ તો મુસા જીહના ભવિષ્યવાણી કનારાન મોકની.



તાંહા દેવ મુસાન કયો કે તુ ડોગા દુયકે પ ચડિત જ ઈત કે તુ વચના દેશ પાલીત શક. મુ'સ વચના દેશ પાલ્યા પન તિયાન તિયામ ફોઅના પરવાનગી આપી ની. તાંહાં મુસા મત જીયા અન ઈઝાયેલીહં તિહ દિહ હુદિ શોક કયા. યહોશુઆ તિંહાં નવા આગેવાન બન્યા. યહોશુઆ હારા આગેવાન અતા. કેવ કે તો દેવા આજ્ઞા પાળના.